

南

史

列傳第四十四

南史五十四

李

延壽

梁簡文帝諸子

元帝諸子

簡文二十子王皇后生哀太子大器南郡王大連陳淑容
生尋陽王大心左夫人生南海王大臨安陸王大春謝夫
人生瀏陽公大雅張夫人生新興王大莊包昭華生西陽
王大鈞范夫人生武寧王大盛褚脩華生建平王大球陳
夫人生義安王大昕朱夫人生綏建王大摯其臨川王大
款桂陽王大成汝南王大封樂良王大圜並不知母氏潘
美人生皇子大訓早亡無封其餘不知不載

哀太子大器字仁宗簡文嫡長子也中大通三年封宣城郡王太清二年十月侯景寇建鄴敕太子爲臺內大都督三年五月簡文即位六月癸酉立爲皇太子大寶二年八月景廢簡文將害太子時景黨稱景命召之太子方講老子將下牀而刑人掩至太子顏色不變徐曰久知此事嗟其晚耳刑者將以衣帶絞之太子曰此不能見殺乃指繫帳竿下繩命取絞之而絕時年二十八太子性寬和兼神用端巖在賊中每不屈意左右竊問其故荅曰賊若未須見殺雖復陵傲呵叱其終不敢言若見害時至雖一日百拜無益於死間者又曰官今憂逼而神貌怡然未喻此意

荅曰吾自度死必在賊前若諸叔外來平夷羯寇必前見殺然後就死若其遂開拓上流必先見殺後取富貴何能以無益之愁橫憂必死之命景之西上攜太子同行及敗歸舩往往相失所乘舩入樅陽浦舟中腹心並勸因此入北太子曰自國家喪敗志不圖生主上蒙塵寧忍違離吾今若去乃是叛父非謂避賊天下豈有無父之國便涕泗嗚咽命即前進賊以太子有器度每憚之恐爲後患故先及禍承聖元年四月追謚哀太子柩太廟陰室

尋陽王大心字仁恕簡文第二子也幼而聰朗善屬文中大通四年以皇孫封當陽縣公大同元年爲都督郢州刺

史時年十三簡文以其幼戒之曰事無大小悉委行事大
心雖不親州務發言每合於理衆皆驚服太清元年爲雲
麾將軍江州刺史貪冒財賄不能綏接百姓二年侯景寇
都大心招集士卒與上流諸軍赴援宮闕三年臺城陷上
甲侯蕭韶南奔宣密詔加散騎常侍進號平南將軍大寶
元年封尋陽王初歷陽太守莊鐵以城降侯景旣而又奉
其母來奔大心以鐵舊將厚爲其禮軍旅之事悉以委之
以爲豫章內史景數遣軍西上寇抄大心輒令鐵擊破之
禽其將趙加婁賊不能進時鄱陽王範率衆棄合肥屯于
柵口待援兵摠集欲俱進大心聞之遣要範西上以益城

處之廩饋甚厚欲與戮力共除禍難會鐵據豫章反大心
令中兵參軍韋約討之鐵敗乞降鄱陽世子嗣先與鐵善
乃謂範曰昔與鐵游處其人才略從橫若降江州必不全
其首領請援之乃遣將侯瑱救鐵夜破韋約等營大心大
懼於是二蕃釁起景將任約略地至益城大心遣司馬韋
質拒戰敗績時帳下猶有勇士千餘人咸說曰旣無糧儲
難以守固若輕騎往建州以圖後舉策之上也其母陳淑
容不從撫膺慟哭大心乃止遂與約和二年將遇害遶牀
謂賊廂公王僧貴曰我以全州歸命何忍相苦乃見射而殞
臨川王大款字仁師簡文第三子也初封石城縣公位中

書侍郎太清三年簡文即位封江夏郡王大寶元年奔江陵湘東王承制改封臨川王魏尅江陵遇害

南海王大臨字仁宣簡文帝第四子也大同二年封寧國縣公少而敏慧年十一遭左夫人憂哭泣毀瘠以孝聞後入國學明經射策甲科拜中書侍郎遷給事黃門侍郎十一年長兼侍中出爲琅邪彭城二郡太守侯景亂屯端門都督城南諸軍事大寶元年封南海郡王出爲都督東揚州刺史又除吳郡太守時張彪起義於會稽吳人陸令公賴川庾孟卿等勸大臨投之大臨曰彪若成功不藉我力如其撓敗以我說焉不可往也二年遇害

南郡王大連字仁靖簡文第五子也少俊爽能屬文舉止
風流雅有巧思妙達音樂兼善丹青大同二年封臨城縣
公七年與南海王俱入國學並射策甲科皆拜中書侍郎
十年武帝幸朱方大連與兄大臨並從武帝問曰汝等習
騎不對曰臣等未奉詔不敢輒習敕令給馬試之大連兄
弟據鞍往還各得馳驟之節帝大說即賜所乘馬及爲啓
謝辭又甚美帝他日謂簡文曰昨見大臨大連風韻可愛
足慰吾老年遷給事黃門侍郎轉侍中太清元年出爲東
揚州刺史侯景入寇建鄴大連率衆四萬來赴及臺城沒
援軍散還東揚州會稽豐沃糧仗山積東人懲景苛虐咸

樂爲用而大連恒沈湎于酒宋子仙攻之大連棄城走追
及於信安縣大連猶醉弗之覺於是三吳悉爲賊有大寶
元年封南郡王賊遣將趙伯超劉神茂來攻大連專委部
將留異以城應賊大連棄走爲賊所獲侯景以爲江州刺
史二年遇害

安陸王大春字仁經簡文第六子也少博涉書記善吹笙
天性孝謹體貌瓌偉腰帶十圍大同六年封西豐縣侯拜
中書侍郎後爲寧遠將軍知石頭戍軍事侯景內寇大春
奔京口隨邵陵王入援戰于鐘山軍敗肥大不能行爲賊
所獲大寶元年封安陸郡王出爲東揚州刺史二年遇害

桂陽王大成字仁和簡文第八子也初封新塗公太清三年簡文即位封山陽郡王大寶元年奔江陵湘東王承制改封桂陽王大成性甚兇麤兼便弓馬至江陵被甲夜出人謂爲劫斫之遂失左髻魏剋江陵遇害

汝南王大封字仁叡簡文第九子也初封臨汝公太清三年簡文即位封宜都郡王大寶元年奔江陵湘東王承制封汝南王魏剋江陵遇害

瀏陽公大雅字仁風簡文第十二子也大同九年封瀏陽縣公少聰警美姿儀特爲武帝所愛臺城陷大雅猶命左右格戰賊至漸衆乃自縊而下發憤感疾薨

新興王大莊字仁禮簡文第十三子也性躁動大同元年封高唐縣公大寶元年封新興郡王位南徐州刺史二年遇害

西陽王大鈞字仁博簡文第十四子也性厚重不妄戲弄年七歲武帝嘗問讀何書對曰學詩因令諷誦即誦周南音韻清雅帝重之因賜王羲之書一卷大寶元年封西陽郡王位丹楊尹一年監揚州遇害

武寧王大威字仁容簡文第十五子也美風儀眉目如畫大寶元年封武寧郡王二年爲丹楊尹遇害

皇子大訓字仁德簡文第十六子也少而脚疾不敢躡履

太清三年未封而亡年十歲

建平王大球字仁玉簡文帝第十七子也大寶元年封建安郡王性明慧夙成初侯景圍臺城武帝素歸心釋教每發誓願恒云若有衆生應受諸苦諱身代當時大球年甫七歲聞而驚謂母曰官家尚爾見安敢辭乃六時禮佛亦云凡有衆生應獲苦報悉大球代受其早慧如此二年遇害義安王大昕字仁朗簡文帝第十八子也年四歲母陳夫人卒便哀毀有若成人晨夕涕泣眼爲之傷及武帝崩大昕奉慰簡文嗚噎不自勝左右莫不掩泣大寶元年封義安郡王二年遇害

綏建王大摯字仁瑛簡文第十九子也幼雄壯有膽氣及臺城陷乃歎曰大丈夫會當滅虜屬妳媼驚掩其口曰勿妄言禍將及大摯笑曰禍至非由此大寶元年封二年遇害樂良王大園簡文第二十子也大寶元年封後入周仕隋位內史侍郎

元帝諸子徐妃生忠烈世子方等王貴嬪生貞惠世子方諸始安王方略表貴人生愍懷太子方矩夏貴妃生敬皇帝自餘不顯

忠烈世子方等字實相元帝長子也少聰敏有俊才善騎射尤長巧思性愛林泉特好散逸嘗著論曰人生處世如

白駒過隙耳一壺之酒足以養性一簞之食足以怡形生在蒿蓬死葬溝壑瓦棺石槨何以異茲吾嘗夢爲魚因化爲鳥方其夢也何樂如之及其覺也何憂斯類良由吾之不及魚鳥者遠矣故魚鳥飛浮任其志性吾之進退恒在掌握舉首懼觸揺足恐墮若使吾終得與魚鳥同遊則去人間如脫屣耳初徐妃以嫉妬失寵方諸母王氏以冶容倖嬖及王夫人終元帝歸咎徐妃方等意不自安元帝聞之又惡方等方等益懼故述此論以申其志時武帝年高欲見諸王長子元帝遣方等方等欣然升舟冀免憂辱行至繇水遇侯景亂元帝召之方等啓曰昔申生不愛其死

方等豈顧其生元帝省書歎息知無還意乃配步騎一萬使援臺城賊每來攻方等必身當矢石城陷方等歸荊州收集士馬甚得衆和元帝始歎其能方等又勸脩築城柵以備不虞旣成樓雉相望周四七十餘里元帝觀之甚說入謂徐妃曰若更有一子如此吾復何憂徐妃不荅垂泣而退元帝忿之因疏其穢行榜于大閤方等入見益以自危時河東王爲湘州刺史不受令方等求征之元帝謂曰汝有水厄深宜慎之拜爲都督令南討方等臨行謂所親曰吾此段出征必死無二死而獲所吾豈愛生及至麻溪軍敗溺死求屍不得元帝聞之心喜不以爲戚後追思其才

贈侍中中軍將軍揚州刺史謚忠壯世子并招魂以葬之
方等注范曄後漢書未就所撰三十國春秋及篤靜子行
於世元帝即位改謚武烈世子封子莊爲永嘉王及魏剋
江陵莊年甫七歲爲人家所匿後王琳迎送建鄴及敬帝
立出質于齊敬帝太平二年陳武帝將受禪王琳請莊于
齊以主梁嗣自益城濟江二月即帝位于郢州年號天啓
置百官王琳摠其軍國明年莊爲陳人所敗其御史中丞
劉仲威奉以奔壽陽遂入齊齊武平元年授特進開府儀
同三司封梁王齊朝許以興復竟不果而齊亡莊在鄴飲
氣而死

貞惠世子方諸字明智元帝第二子也幼聰警博學明老
易善談玄風采清越特爲元帝所愛母王氏又有寵及方
等敗後元帝謂曰不有所廢其何以興勿以汝兄爲念因
拜中撫軍將軍以自副又出爲郢州刺史鎮江夏以鮑泉
爲行事時元帝遣徐文盛與侯景將任約相持方諸年十
五童心未革恃文盛在近不恤軍政日與鮑泉蒲酒爲樂
侯景知之乃遣其將宋子仙從間道襲之百姓奔告方諸
與鮑泉並不信曰文盛大軍在下虜安得來始命閉門賊
已入城方諸方踞泉腹以五色毳辨其鬚子仙執方諸以
歸王僧辯軍至蔡洲景遂害之元帝追謚貞惠世子